

Temps da catscha, per mei in temps tut special

Rinaldo Giger, Pardé/Val Medel

Dalla redactura dil Calender Romontsch sund'jeu vegnius dumandaus da raquintar ord mia veta da catschadur. Bungen fetschel jeu quei.

Jeu sun vegnius infectaus cul virus da catscha gia d'affon. Da buob hai jeu giu caschun d'accumpignar miu bab sin bia turas da catscha. Da pign ensi sun jeu adina staus colligiaus stretgamein cun la natira e perquei eis ei stau per mei gia baul decidiu ch'jeu vegli daventar catschadur. Cun 20 onns hai jeu fatg ils examens. Igl anteriur survigilader da catscha, Christofel Degonda da Cumpadiels, ei segidaus cun nus giuvens da sepreparar sils examens.

Avon 22 onns pia ei lu igl emprem di da catscha arrivaus. Il bab mava gia dapi biars onns cun in cumpogn a catscha ed els dus secapevan oreifer. Jeu level enzaco nuota disturbar lur cunvegnentschas ed aschia eis ei sedau ch'jeu hai bein fatg part da quella grappa da catscha, mo sundel lu ius igl emprem di persuls a catscha en in auter territori. La stad vevel jeu engartau in bellezia taur tscharva. Mo avon che la catscha mondi libra eis el buca staus dentuorn pli. Jeu cartevel denton sontgamein che quel

seigi reservaus per mei igl emprem di da catscha e sundel lu ius l'emprema damaun da stgir el liug previu e spitgau entginas uras. Adumbatten. Lu hai jeu udiu las muntanialas sisum la pézza e detg si per memèz: quellas cloman mei! Jeu pudevel ual esser sisum ch'jeu hai turnau a mirar anavos el liug nua ch'jeu erel staus la damaun e viu in camutsch ed in taur tscharva. Immediat hai jeu emblidau las muntanialas e sun turnaus engiu. La tscharva era puspei sezup-pada ella draussa. Il camutsch era aunc leu. Jeu hai lu contemplau el ina grond'uriala e pli ditg ch'jeu miravel sin el e pli gronds ch'el vegneva. La finala hai jeu sittau ed el ei curdaus tuccaus mortalmein giu dil crap. Spertamein hai jeu turnau a cargar mia buis e menau la cona en direcziun ch'jeu sminavel il taur tscharva. Mo nuot ei semuentau. Jeu hai spitgau e spitgau... ina liung'uriala. Tuttenina stat il schani avon mei. Aunc in'eglidada atras il perspectiv per far la segira ch'el seigi lubius e lu la buis ed il taur en mira... pluff! Miu siet tucca la noda ed il taur croda. Mo tgei schabegia enaquella? Dus ulteriurs taurs tscharva levan en pei. In da quels sun jeu lu aunc

vegnius da sittar, l'auter ha pudiu mitschar. Cu quell'acziun ei stada vargada, ha miu tgierp entschiet a tremblar. Jeu hai aunc spitgau in'uriala e sun lu serendius cun tut respect vi tier ils animals ch'jeu vevel priu la veta. Lu hai jeu drizzau in'egliada viers il tschiel ed engraziau.

Suenter ha ei giu num dad ir vid la «lavur cotschna», il sventerlar. Jeu havess saviu bargir! Tontas gadas vevel jeu giu mirau tier co il bab fageva quella lavur. Ed ussa erel jeu cheu persuls. Mo quei ha nuota dau donn. Probabel hai jeu giu ualти ditg da far quella lavur. Mo magari eis ei bien dad emprender ella practica. Tgi che ha giu quella sera il pli grond plascher da miu success, il bab ni jeu, sai jeu aunc adina buc. Aunc oz eis ei bein aschia ch'ins selegra dil success da l'auter gest aschi fetg sco digl agen. Che

quels eveniments da miu emprem di da catscha han pregnau mei sentel jeu aunc oz en miu secuntener persunal dad ir a catscha entochen ella reacziun suenter il siet. En mes 22 onns da catscha beinenqual historia serimnada. Enquala vegn secapescha raquintada sco «latin da catschadurs».

Ina part essenziala ei la cumpignia duront il temps da catscha, igl esser ensemble la sera en tegia e sediscuorer. Cu ei va encounter la fin dalla catscha sedat ei magari ch'ins va a catscha cun auters camerats.

Per mei eis ei impurtont da sedar giu cul tema da catscha e cun la natira duront igl entir onn. Jeu sun bia ella natira e contemplé illos animals. Igl onn vargau ha mia dunna fatg illos examens da catscha ed ei gia ida a catsch'aulta gliez atun e quei cun success. Nos treis affons





che van aunc a scola accumpognan nus mintgaton sin nossas turas communablas da catscha.

Buca emblidar less jeu era la catscha bassa. Lezza ei in bienton autra che la catsch'aulta. Igl atun avon ch'igl unviern arriva eis ei tut special dad astgar esser ora ella natira. Lu ei era negina hectica da catschadurs dentuorn ed ins vesa bia bials maletgs. La catscha sil tgiet selvadi ei per mei la cruna da quella catscha.

Cu l'emprema bischa ei era il temps dalla catscha da laghetg arrivaus. Quella catscha nua ch'ins spetga zanua en ina tegia duront la notg uras en ed uras ora sin l'uolp. Quei ei ina catscha fascinonta ch'jeu mon fetg bugen inagada ni l'autra. Miu bab ei en quei grau in specialist ed jeu hai empriu bia dad el. Nus motivein lu era in l'auter.

Fetg bugen prendel jeu part dils dis da tgira dalla secziun da catschadurs. Ils

catschadurs fan bia uras lavurs da tgira, tgira en favur dallas selvaschinas e digl uaul. Igl ei impurtont da mantener il spazi da viver dallas selvaschinas ed era fetg impurtont da mantener igl equiliber denter uaul e selvaschina. Impurtontas per uaul e selvaschina ein era las zonas da ruaus duornt igl unviern che las vischnauncas han creau. Il carstgaun vul esser libers e semova empau daper-tut e quei sur onn. Il trend ch'ei vegnius si ils davos onns da viagiar cun calzers da neiv e far turas cun pials sut ils skis e quei dapertut dat a mi empau da patertgar. Igl ei fetg impurtont che las selvaschinas hagien loghens d'unviern nua ch'ellas vegnan buca disturbadas. Sco catschadur medelin sund'jeu era commember dalla secziun da catschadurs Vallatscha. Quell'uniun ha in onn ora differentas activitads. Denter auter porscha ella era la pusseivladad da trenament da sittar. Fetg ault tenin nus il di dalla catscha communabla. Sper far da cumionza catscha en favur dall'uniun ei il scopo principal da quei di quel da saver seser ensemes da miez-di e tgirar la cumpignia ed il contact persunal.

La catscha ei sesviluppada fetg ils davos onns. Bia ei vegniu auter. Per mei ei la catscha aunc oz fetg biala ed era sche bia ei reglau lai ella aunc fetg bia libertads. Quellas libertads sperel jeu dad astgar guder aunc biars onns.